

Date – 01/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma'n state sum enkawl kawngah hma an sawn nasa tih sawiin SASCI hnuaijah Efficiency in Public Financial Management lawmman an hmuh thu a sawi.
2. Kolasib District Magistrate chuan thenawm state Assam in inthlanpui an hmachhawn mek avangin ramri-ah fimkhur turin mipui a chah.
3. Thla 4 chuang hlawh lak tawh loh avangin CADC hnathawkte April ni 2 atangin nawrh an tum.
4. Prime Minister Narendra Modi chuan Asia khawtlang lam a buaina chuan India ah buaina a thlen loh nan sawrkar in nasa tak a hma alak thu a sawi.

<><><>

CM

Chief Minister Pu Lalduhoma'n state sum enkawl kawngah hma an sawn nasa tih sawiin SASCI hnuaijah Efficiency in Public Financial Management lawmman an hmuh thu a sawi.

Chief Minister hian nimin khan sawrkar kum 2025-26-a ni hnukung ber anih angin tlai lamah Treasury Officetlawhin Treasury Office-a thawktute nen an inkawm an hnathawh dan an sawiho a ni.

Pu Lalduhoma chuan kuminah Finance Department-a thawktute thawhrimna zarah SASCI hnuaijah Efficiency in Public Financial Management lawmman an hmu a ti a. Sorkar laipui hnuaijah sum kalpuina SNA SPARSH leh GST TDS avangin eng emaw harsatna neuh neuh tawh mahse state sum enkawl na kawngah hma an sawn nasat thu a sawi bawh.

Niminah hian Minister Dr. Vanlalhlana leh Adviser to CM Pu TBC Lalvenchunga bakah sawrkar mi pawimawh ten an tawiam a ni.

<><><>

CENSUS 2027

Ram pum Chhiarpui chu ram chung hmun dangte rualin vawiin atang hian Mizoramah tan a ni ve dawn.

Chhiarpui 2027 hi India ram pum Chhiarpui vawi 16-na a ni dawn a, India ram zailan a neih hnu a a vawi 8-na a ni thung dawn a. Chhiarpui lo awm tur hi thawh hniha kalpui a ni ang a. Vawiin atang hian Chhiarpui hna thawktute chuan mihring chhinchhiah hna ni lovin in ding lai leh a chhunga chengte dinhmun leh an bungraw neihte chhinchhiah hna (house listing) an tan ang a. Vawiinah vek hian Chhiarpui atana mahni inziahlul leh inthun theihna self enumeration portal chu hawn a ni ang a. Online hmangin mahni inziahlul tan theih a ni ang. Tun thla ni 15 atanga May ni 14 inkar chung khian ‘House Listing Block (HLB)’ an tih chu kalpui a ni ang a. Mahni leh mahni inziahlul piah lama mihring chhiarpui tak tak chu nakum lamah kalpui a ni dawn a ni.

Mahni ngei a form fillup hi vawiin atanga April ni 15 thleng tih theih tur a ruahman a ni a, digital hmang lo a chhiarpui neih hi thlakhat chung April ni 16 atanga May ni 15 thleng neih a ni dawn a, Andaman & Nicobar Island, NDMC area, Delhi Cantonment Board, Goa, Karnataka, Lakshadweep, Mizoram, Odisha leh Sikkim ah te neih a ni dawn a ni.

Voicecast

Tun tum Chhiarpui hi in tina luha mihring chhiar a ni dawn chungin lehkhapuan hmang lovin, a vawikhatna atan digital hmang veka kalpui a ni dawn a. Digital a kalpuina-ah hian mobile apps hman a ni dawn a ni. Chhiarpui kalpui hun tur hnuhnung ber kum 2021 khan Covid-19 hri leng avangin kalpui a ni ta lova. Tun tum hi kum 2011 hnu a India ram Chhiarpui awm leh hmasa ber tur a ni dawn a ni.



ASSAM BOUNDARY

Kolasib District Magistrate chuan thenawm state Assam in inthlanpui an hmachhawn mek avangin ramri-ah fimkhur turin mipui a chah.

Nimina hriattirna a tihchhuah-ah Kolasib District Magistrate, Pu Lalmuanpuia chuan thenawm State Assam-in inthlanpui an hmachhawn mek avangin ramri-ah fimkhur turin mipui a chah a. ECI kaihhraina hnuaiha State inrina chheh velah venhimna uluk leh khauh zawka kalpui mek a ni a, duty leh patrolling te pawh uar taka neih a nih avangin ramri hrula khawsa leh veivak thinte chu fimkhur thiam tur leh thil pawh thleng thei laka inveng theuh turin a chah a ni.

Kolasib District Magistrate chuan, Pathianni zana Bairabi Zophai-a boruak tha lo tak thleng chu Kolasib District Administration in pawh a ti hle a ti a, mipuite chu thlaphang lo tur leh thlamuang taka awm a, District Administration leh Sorkar hmalaknate thlawpa, theihtawp chhuah tlang theuh turin a ngen a ni.



GAS

State Level Monitoring Cell on LPG/POL thukhawm chuan Eirawngbawlna Gas-ah harsatna a awm rih loh thu an sawi.

State Level Monitoring Cell on LPG/POL hian Asia khawtlang lama indona thleng mek avanga India leh khawvel hmun hrang hranga eirawngbawlna Gas leh a kaihhnawih buaina awm mek chungchang sawi hoin, mipui an chia i lohna tur leh buaina a awm lohna tura Sorkar hmalakna hrang hrang an thlir ho a, buaina tipunlun thei tura chhekkhawl ruk te, a thlen lohna hmun a tura Gas lakpen a nih lohna tur leh manto zawka Black-a zawrh a nih lohna tura Sorkar hmalaknate thlir ho a ni a. Tun dinhmunah Mizoram chu an dinhmun a that thu leh mipui tan chiaina tur a awm loh thu tarlan a ni.

Thukhawmnaah hian Mizoram Consumer Union, Mizoram Indane Distributors Association leh RGGLV Distributors ten harsatna an tawhte sawiin, hmalak zel dan tur an sawi ho nghal a ni.

<><><>

CADC

Thla 4 chuang hlawh lak tawh loh avangin CADC hnathawkte April ni 2 atangin nawrh an tum.

Chakma Autonomous District Council (CADC) hnuai hnathawk Chakma District Council Employees' Association; Chakma District Council Teachers' Association leh Heads of Department hrang hrang chu nimin khan thukhawmin, thla 4 leh a chanve chung hlawh an lak tawh loh avanga harsatna hrang hrang an tawh sukiang tura hmalakpui tura March ni 16-a Governor hnena ngenna an theh luhah vawin thlenga chhanna leh hmalakna an hmu lo chu paw i an tih thu an sawi a. Hetianga CADC hnuai hnathawktuten thla 4 leh a chanve chung zet hlawh an lak tawh loh avangin ni tin khawsak phungah harsatna an tawh bakah zirna, hriselna leh kawng hrang hrangah a ngawng tih an sawi.

CADC hnuai thawktute chuan, March ni 11-a an thukhawm tuma an lo rel tawh angin March ni 16-a Larsap hnena lehkha an theh luh chuan awmzia a nei lo zel a nih chuan CADC Sorkar enkawl zirna in tiamin, CADC hnuai hnathawk zawng zawng chu April ni 2 atangin tiamchin awm lova nawrh an remti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawin chawhnu dar 2 leh a chanve-ah Chanchinthar puan leh a ni ang.

<><><>

TOURISM

New Delhi-a cham mek Tourism Minister Pu Lalnghinglova Hmar chuan ADB hotute hnenah Mizoramin tourism lama hma a sawn leh zual theih na'n loan mamawh a nih thu a thlen.

Tourism Minister hi nimin khan Asian Development Bank (ADB) hotute nen hian an inkawm a. Mizorama tourism lama hmasawna thleng mek chu thantir zel tur leh zinmi thahnem zawk dawngsawng thei turin State sorkar sum ruahman ringawtin a daih loh avangin Externally Aided Project (EAP) kaltlangin ADB atanga loan mamawh a nih thu a sawi a. Mizoram khawpui Aizawl chu khualzin tan zan thum chamna daiha siam chu an thupui pakhat a ni a ti a. Hemi rual hian thingtlang lamah Eco-Tourism kalpui a, khawtlang nen tangkawpa community based tourism kalpui chu an thupui a ni a, Wildlife Tourism kalpui turin Environment & Forest Department nen pawh thawhhona thuthlung an ziah tawh tawh thu a sawi bawk.

Sports Minister ni bawk Pu Lalnghinglova Hmar chuan Sports chu intihhlina satliah ni lovin eizawna a ni a, Sorkar laipui pawhin a dah pawimawh avangin Infrastructure piah lamah infiammite tihmasawn tura man-power development lama kal nat an duh a, hemi atan hian ADB puihna an mamawh tih sawiin, Sports tourism chu Mizoram tan sum lak luhna tha a nih theih thu a sawi.

<><><>

MRB CSR

Mizoram Rural Bank chuan Corporate Social Responsibility (CSR) kaltlangin nimin khan cheng nuai 19, sing 9 leh sang 4 chuang hu thilpek an hlan.

Thilpek hlanna hi Mizoram Rural Bank Head Office Board Room ah buatsaih niin Secretary CSR Committee Pu V. Lalrinmawia'n thilpek inhlanna inkhawm a kaihruai a. He hunah hian Computer Set 24 leh A3 printer 1 chu Industrial Training Institute (ITI), LESDE Department ah hlan a ni a. Hemi rual hian Mizoram Journalist Association (MJA) te hman turin Computer set 5 hlan nghal a ni bawk. Vawiin vek hian HATIM (Higher and Technical Institute of Mizoram), Pukpui, Lunglei hnenah Smart Interactive Board (inches 65 a hlai) chu hlan a ni bawk a. SP Office, Champhai a hman turin Computer Set 3 leh Printer 3 hlan a ni bawk. MRB hian an bank hlawkna atanga chhutin CSR kaltlangin kumin hian cheng nuai 100 chuang chu pawl, khawtlang leh sorkar pisa hrang hrang-ah an lo luang chhuak tawh a ni.

<><><>

WEST ASIA

Prime Minister Narendra Modi chuan Asia khawtlang lam a buaina chuan India ah buaina a thlen loh nan sawrkar in nasa tak a hma alak thu a sawi.

Nimin khan Gujarat a Va. Tharad district a Nani cheng vaibelchhe 19800 chuang senga hmasawna tur project hawna leh lungphum a phum na ah sawiin, west Asia a buaina in nghawng a neih chu sawrkar laipui chuan ram mipui ten an tawrh loh nana tan an lak thu a sawi a ni.

Nimin a Project hrang hrang a hawn te chuan hmasawna a thlen dawn thu sawiin, he bial a sumdawna kawng ah pawh hmasawna tur a puih dawn thu a sawi bawk.

<><><>

INCOME TAX ACT 2025

Vawiin atang in Financial Year dan thar hman tan a ni dawn.

Kum sawmruk zet a upa Income Tax Act chu vawiin atangin Income Tax Act thar, 2025 hmang a thlak a ni dawn. He dan thar hi chhiah petute tan awlsam zawk tura siam a ni a, chhiah pek dan hmanlai tawh te paih in, awlsam leh zangkhai zawk tur a ruahman a ni.

Reserve Bank of India chuan digital payment transactions zawng zawng chu two-factor authentication dan (norm) zawm tur in a hriattir a ni.

Financial year 2026-27 atana siamthat FASTag annual pass man thar pawh vawiin atanga hman tan tur ni in, Permanent Account Number (PAN) card dilna leh siamthat dan tur pawh vawiin atangin thlak danglam a ni.

<><><>